



Isumaginninnermut Aqutsisoqarfik - Paarisa

**Kalaallit Nunaanni
kajumissutsimik sulineq
Kajumissutsiminnik
suliaqartut oqaluttuaat
Nalunaarusiaq 2022**




NAALAKKERSUISUT
GOVERNMENT OF GREENLAND

Siulequt

Kajumissutsiminnik sulisut atugaat, inunnik isumaginninnermik nuna tamakkerlugu sulineq, pitsanngorsarumallugu Paarisa apersuinermi immersugassaq atorlugu misissuisimavoq Kalaallit Nunaanni kajumissutsiminnik suliaqartunut sammitineqartumik.

Apersuinermi immersugassaq atorlugu misissuinerup Kalaallit Nunaanni kajumissutsimik sulisuunerup qanoq innera pillugu paasissutissanik katersuinissaq siunertaraa. Ilisimasat taakku atorlugit kajumissutsimik sulisut pitsaanerpaamik siunissami atugassaqalersissinnaavagut taamaalillunilu najukkani inuiaqatigiinni kajumissutsimik sulisuunissaq soqutiginarnerulersillugu.



Paarisa-p misissuinerani apeqqutit akissutillu

Apeqqut 1: Sooq kajumissutsimik sulisarpit?

Akissutit:

"Volleymik timersorsinnaajumallunga"

"Nammineq kajumissutsinnik ikiuutinngilanga massakkut. Kisianni peqataaffeqarnikuuvunga."

"Pingaaruteqarmat."

"Erngutara sisoraartartup klubbia ikiorniarlugu."

"Timersuut nuannarisara siuarsarniarlugu meeqqanut sungiusaasuuvunga."

"Kalaallit Meerartaat aqqutigalugu allafigineqarama kajumissutimik suleqataarusunnersunga."

"Isumaqarama tamatta tunniussassaqaarsinnaasugut. Pisinnaasakka pikkoriffikkalu atorlugit kajumissutsimik sulinikkut nunannut iluaqutaavunga."

"Kajumissutsinnik sulisarpunga inuiaqatigiinnut utertitsinissannik inuttut pisussaaffeqartutut misigisimagama, upperilluinnarakkulu meeqqat inuusuttullu soqutigisaat mikisunnguuneranniit inerisarneqarpata tamanna inuiaqatigiinnut nukittorsaataassasoq."

"Inuiaqatitsinnut tunniussisinnaanera uannut naleqartorujussuummat."

"Tunniussaqaarususeq pigigakku."

"Nuummi Spejderit."

"Meerartatta nuannersorpasuarunik misigitinnerat uannut nuannaarutaasorujussuuvoq."

"1. Isumalimmik suliassaqaartippaanga 2. Nuannerpoq 3. Meeqqanut ineriartornerannik nukittorsaataasumik iliuuseqarpunga."

"Meeqqat pillugit."

"Nuannarigakku kajumissutsinnik sulillunga aamma misilittagaqaqarfigigakku meeqqanik sullissineq aamma assut inuttut pissarsiaqartarnermik, suleqatit qiimasut eqeersimaartut."

"Suliaqarluarsinnaagama."

"Ikiuullunga sunniuteqarlungalu nuannarigakku."

"Piumassuseqarnera allanut ingerlateqqinnissaanut peqataarusukkama."

"Inuiaqatigiinnut tunniusserusukkama, nalunnginnakkulu suliassat pikkorissunit isumagineqarnissaannut assassaaleqisoqartoq."

"Soqutigilluinnarakku kiisalu meeqqanut inuusuttunullu tunniussaqaarnissaq nuannarilluinnarlugu. Taakkununga isumalimmik tunniussineq oqaasertalerneqarsinnaanngitsumik angisuujuvoq."

"Nuannarisat soqutigisat pequtaallutik, aammalu meeqqatta soqutigisaanut ikiuunnissaq pigaaruteqarmat."

"Assigiinngitsuni kajumissutsinnik sulivunga, sisorarluni Kalaallit Nunaanni pissartanngorniunnernut ikiuuttarlunga, inissiamut peqatigiiffimmi siulersuisuniillunga, kalattoortartut peqatigiiffianni siulersuisuniillunga, Meeqqat Ikiortigit. Kajumissutsinnik sulinissamat nalunaarnissara uannut pissusissamisoorpoq, allat peqatigalugit aallartisaaneq allallu peqatiginissaat nuannaraara."

"Inunnik isumaginninnermik suliaqarnermik misilittagaqalerusullunga, soqutigisaqaqatinnik allanik naapitserusullunga allanullu ikiuullunga."

"Iluuquseeqataaneq (inooqataasutut pisussaanermik misigineq)."

Apequt 2: Nammineq kajumissutsinnik ikiukkaangavit suna inuttut pissarsiarisarpik?

Akissutit:

“Uippakajaaneq :) Kajumissutsiminnik sulisinnaasut amigaataapput, KISIANNI volleymik timersornissamut periarfissippaanga inuppassuillu nuannersut nutaat ilinniarlugit :)”

“Peqataaffeqarneq. Akisussaaqataaneq. Tunniussaqaarneq.”

“ Iliuseqaqataavunga.”

“Eqqarsaatigivallaarneq ajorpara, ukiorpassuit ikiuuttarnera pisussaasutut misigisarama.”

“Ilisimasat ilikkakallu meeqaqanut ingerlateqqillugit nuannertarpoq.”

“Nuannisaritineq nuannaarnermillu tunisineq.”

“Kajumissutsinnik suligaangama piffissamik pisinnaasannillu atuinera nuannaarutigisaqaara. Ikiuunnigut ajoraluartumik amerlasoorpassuarnit aamma pisariaqartinneqarpoq, piffissaqarfiginissaa aamma tunniussisarpoq.”

“Tarninnut inuussutissalersuisarlunga inuttut misigisarpara, tamanna nammineerlunga meeraaninni amigaatigisarsimagakku (soqutigisat/ineriartornissamut soqutigisat aallunniisaannut inissaqartinneqarneq). Piffissannik sammisassanut CSR-imut tunngassuteqartunut atorsinnaagukkit taamaaliukutsuussaanga. Kalaallit Nunaannilu najukkani suliffissaqarfiit amerlanerussappata tamanna periarfissanik annertusaassaaq, inuusunneriniimmi ilinniarterup, nutaaliernerup aallartisaanerullu iluani periarfissarpassuarnut takutitsivigineqartarmata.”

“Inunnik naapitassarinnigisaraluannik naapitsineq - taakkulu peqatigalugit pilersitsineq.”

“Inuttut ineriartorneq.”

“Ikinngutigiiinneq, silamiinneq meerarpassuarnullu pitsaasumik iluaqusiisinaaneq.”

“Attaveqaatit pitsaasut, ikinngutit nuannersut allanullu iliuuseqarneq.”

“Soqutigisaqaqatinnik allanik ataatsimooqateqarneq. Nuannersunik uatsinnut isumalinnik suliaqaqatigiittarpugut.”

“Tunisineq aamma peqatigiinneq.”

“Inunnet atanerulerneq. Nuannaarneq. Qiimmaallanneq. Nukissamik tunineqarneq.”

“Nalungisartaartorneq, ineriartorneq, nuannaarneq.”

“Ilorrisimaarneq, ataatsimoorneq, peqatigiinneq, pissarsisimallunga tunniussaqaarsimallungalu.”

“Nuannaarneq, nukissaqarneq ikinngutsillu nuannersut.”

“Allanik ikiuineq nuannaalersitsisarpoq, isumaginninnikkullu atugarliortut ikiornissaat pingaarnertut ukkatarisarpara taakkuummata aaqjissuusaanikkut puigugaakkajunnerusartut.”

“Meeqqat isaanni anersaaninneq takullugu nuannareqaara inuttullu nuannaarnermik, isumassiuinermik, asanninnermik neriummillu tunniussinnaaneq inuttut tunissutinit annersaavoq.”

“Anguniagassanik pilersitseqataallungalu angusaqaqataaneq inuillu nuannaartut takunerat iluaqutaavoq.”

“CV-imi misilittakkat allakkiallu, sapinngitsunga upperalugu, ilisarimasat nutaat inuillu allat pillugit nutaamik paasinnineq.”

“Meeqaqanut inuusuttunullu ikiuunnermut tunisinermillu peqataasinnaanera inuttut tulluusimaarnermik tunisarpaanga inuttullu tuniorarneqarlunga. Meeqqat inuusuttullu naapinneranni nuannaarneq ikiuussinnaanerlu.”

Apeqqu 3: Nammineq kajumissutsinnik ikiutiinnassaguit suut tunngaviussappat?

Akissutit:

“Kisimiittutut misiginnginneq - arnat amigaatigaagut!!”

“Peqataaffiginikuusakka ilai piffissamik killiligaapput. Ass. Isiginnaagassialiorneq. Arsaattarfimmik nunaqqatigiilernissaq illuanni suleqatigiinneq. Ilimagaara uannut pitsaanerpaassasoq ersarissumik allanneqartarpata suna siunertaralugu sutitsisoqalernersoq, ulloq suna, qassiniit qassinut il.il. soqutigisannut takkussinnaassassagaluarpunga pinsinnaagaangama. Ajunngitsunik siunertallit tapersersorusunnartaqaat.”

“Siulersuisuniit nutarterneqartarneq paasissutissanillu tunineqartarneq.”

“Erngutara tapersersorniartalugu ikiuuttarpunga, ernera sisoraartarunnaamat uninnikuugaluarpunga freerfeqarneq ajorama. Massakkut pinsinnaatillunga ikiuuttarpunga. Kisiat soorunami utoqqaliartorama ikiunnera annikillinikuuvoq. Weekendit ilaanni sulisarama.”

“Pisortaniit tapersersorteqarneq sungiusaanerullu nuannersuujuarnissaa.”

“Ikiuineq, nuannaqataaneq, tunniussineq, suleqataanerlu.”

“Kajumissutsimik suliaqartuusugut oqaloqatigiittarfeqaralarutta iluassagaluarpoq soqutigisaqatigiiffippassuit peqatigiiffipassuillu naapilaartarnissaat iluaqutaasinnaammat.”

“Kajumissutsinnik sulisaannassaguma attaveqarfiiit/eqimattat/sammisassat ataatsimoorfiusinnaasut oqalliffiusinnaasullu pisariaqartissinnaavakka. Inuiaqatigiinnut tunngasunut suliniutinut/misissuinernut/naatsorsueqqissaarnernut piviusunik takutitseqataasunut tunniussisoqarsinnaalluni inuiaqatigiinnilu ajornartorsiutinik aaqqiinissamut/annikillisaanissamut sakkussaarluni.”

“Sunik tunniussaqaarnitsinnik iluaqutaaneraniillu ukkataqarneq”

“Kajumissaagara anguniakkaminik pissarsiaqaraangat, annermik minnermilluunniit.”

“Najukkami inuiaqatigiinnit pitsaanerumik ikorfartuineq, pingaartumik ingerlatsinermut aningaasaqarnikkut tapersiinnikkut. Assersuutigalugu aningaasanik katersuinisarnermut, peqatigiiffimmik qanoq ingerlatsineq pillugu, suliasannut tunngasut soorlu eqqagassalerinermut nuisanissamullu kommunip najukkami ingerlatsivianit ikiorneqarlunilu siunersioqatigineqarneq.”

“Peqatigiiffitsinni aningaaserisuuvunga, ingerlatsinermut aningaasanik qinnuteqarniarneq ajornartorujussuusoq misigisarpara. Missingersuutit taamaallutik ataqatigiissinniarnarat ajornartorujussuusarpoq naggataatigullu kajumissutsiminnik sulisut unerarnerannik nassataqarluni.”

“Pisortanit ikorfartorneqarneruneq aningaasatigullu ikiorneqarneruneq. Taamaangippat qasulluinnassaagut. Nuummi kajumissutsimik sulineq ajornakusooqaaq. Kommunimit Namminersorlutillu Oqartussanit tapersersorneqarneq amigaataasoq misigaarput. Ingerlatsinermut taperserineqarnissaq ajornakusooqaaq nuna tamakkerlugu sulinginnatta. Illuatungaanili Kalaallit Nunaatut ittumi nuna tamakkerlugu suliniarneq ajornartorujussuuvoq. Ingerlatsinermut tapiissutit assersuutigalugu Isumaginninnermut Aqutsisoqarfimmit aamma Tips aamma Lottomit isiginiarneqarneq ajorput. Kommunimit ingerlatsinermut tapiissutitut neqeroorutigineqartut ikingaarmata qinnuteqarnissamut sulinermut atatillugu qinnuteqarnissaq imminut akilersinnaanngingajappoq.”

“Piffissaq nuannaarnerlu.”

“Meeqqanik sullissineq,meeqqat nuannaartinnissaat, pinngortitamiinneq, suleqatissat eqeersimaartut, immitsinnut ilikkariartorneq.”

“Suleqatigiilluarneq.”

“Suleqateqarlunissaq, attaveqatigiillunissaq, ataqqeqatigiinnissarlu.”

“Suliakka inunnit nuannaartigineqarnerat.”

“Eqaatsumik periaaseqarneq, inuit ikiuunninnut qujamasullutillu naleqartitsinerat. Siornatigut allami kajumissutsinnik ikiuuttarpunga, qujasuillimmata unippunga.”

“Akuerineqarlunilu tusaaneqarneq.”

“Nammineq inuttut aallutat soqutigisallu, meeqqamalu soqutigisaat.”

“Timikkut tarnikkullu nukissaqarama tamannalu inunnut/ileqqorissaarnermut tunngatillugu isumaqarpoq allanillu ikiueqataallunga.”

“Aqutsisunit akuerineqarneq, piginnaanngorsaaneq iluaqutaasutullu misigisinnaanera.”

“Kajumissutsiminnik sulerusuttut amerlinissaat kiisalu aningaasaqarnikkut tarnikkullu pisortanit oqartussaasunit inuussutissarsiortunillu tapersersorneqarneq.”

Apequt 4: Nammineq kajumissutsimik sulineq ilinnut sunaava?

Akissutit:

“Ulluinnarni inuunerup ilagiinnarpaa.”

“Sunaluunniit aningaasanik akissarsiffiginagu suleqataaffik. Ataatsimoorussaasinnaavoq ass. aputaajaaqatigiinneq, iliveqarfimmi torersaaqatigiinneq, arpatsitsinernik aaqqissuusineq, katersuiniarnerit il.il. aammali ataasiakkaatut iliuusaasinnaavoq. Ajunngitsumik siunertalik.”

“Nuannaarneq ilikkagaqarnerlu.”

“Misigisimavunga nuannaarneq ataatsimoornerlu pisarlugu.”

“Ilisimasakka ilikkarnikuusakkalu meeqqanut ingerlateqqinnissai.”

“Inunnut ikiuineq.”

“Aalajangersimaqqissaartumik aningaasanik katersisarpugut ilaqutariinnut meerartalinnut pissakillioortunut ingerlateqqittakkatsinnik. Tamatuma saniatigut allarpassuarnik isumassarsiaqarpugut. Røde Korsimi aamma kajumissutsinnik sulisarnikuuvunga. Ilaqutariinnut pisariaqartitsisunut nerisassanik tunniussisarpunga. Ilaqutariinnut mattusimasunut niuerniussisarpunga. Nittartakkani suliassanik, SoMemilu saqquminerunissamat ikiuuttarpunga.”

“Inuiaqatigiinnut meeraagallarama tunniusserujussuarsimasumut, pingaartumik ilinniarninnut atatillugu, kajumissutsinnik sulinikkut utertitsinissamat uannut periusaavoq. Assersuutigalugu Kangerlussuarmi aasakkut sapaatit akunnerini pingasuni pikkorissarnermut akeqanngitsumik peqataasinnaasimavunga inuusuttut ilisimatusarnermik ilinniagaqarnissaat kissaatigineqarmat. Danmarkimi ilinniagaqarpunga iluaqutissarpassualimmik. Sammisassanut arlalinnut kajumissutsimik sulisulinnut peqataasarsimavunga. Kajumissutsimik sulineq inuiaqatigiinnut utertitsinissamat periusaavoq, aamma meeqqat inuusuttullu assinganik periarfissaqarnissaasa qulakkeernissaanut peqataanissamat, meeqqat inuusuttullu inuunermi pissarsiaqarluarnissartik ilisimanissaannut uanniillu pissarsiaqarnerunissaannut.”

“Inuiaqatigiinnut utertitsineq - kinguaariinnut tulliuuttunut aningaasaliineq.”

“Allanngerusussuseqarneq, kivitseqataaneq, ikiuineq.”

Ulluinnarni inuuninni allat nuannaarnissaannut piffissaliinera ”

“Kulturit, ukiut, aamma nunat inunngorfiit akornanni ataatsimoorluni soqutigisaaq aallutaq pillugu ataatsimoorussineq.”

“Allanut iliuuseqarneq akissarsissutigiginagu. Uannulli aamma iliuuseqarneq, inuunera isumaqarnerulersinniarlugu.”

“Ikorfartuineq nuannaartitsinerlu.”

“Piumassuseq, imminut tunniusimaneq.”

“Tunniussaqaarneq.”

“Tunniussaqaarneq sunniuteqaarneq maligassiineq, inuttut ineriartorfigisamik peqataaneq.”

“Allanut inunnut ataasiakkaanuunngitsoq sammisassaqaartitsinernut peqataanermut pilersarusiornermulluunniit piffissamik nukimillu atuineq.”

“Utertitsivigineqarani inunnut iliuuseqaqatigiinneq, sikkertumik takusaqarneq immini tunissutaalluni. Inoqatinik ikiuineq nammineq ikkiuunnissamat nukissaqarneq pissutigalugu.”

“Ikiorneqarnissamik pisariaqartitsisoqarpat ikiuunneq aaqqissugaappat aaqqissugaanngippalluunniit. Meeqqat inuusuttullu aasakkut sammisassaqaartinneqarnissaannut niuerniussisoqarsinnaavoq. Ikiorneqarnissamik pisariaqartitsisoqaraangat ikiuunnissara uannut pissusissamisorpoq.”

“Nammineq inuttut timikkut tarnikkut nakooqatigisarpara, misilittakkallu misigisallu nukissatut ilinniarfittut tigusarlugu.”

“Kajumissutsimik sulineq ataatsimut anguniagaqarnermut tunniussinertut, akilerneqarnissamik piumasaqarnani najuunnertut tunniussaqaarnertullu uanga isigaara.”

“Allanut iliuuseqaraanni - akissarsiuutigalugu suliffiup saniatigut. Akissarsiaqarnani imaluunniit takussutissatut akilerneqarluni. Perusussuseq, pisussaaffik pinnagu (suliffimmisut), allanut ikiuineq.”

“Aningaasaqarnikkut siunertaqarnani (- akissarsiat) iliuuseqarnerit.”

Naggasiineq

Apersuinermi immersugassaq atorlugu misissuineq aqutigalugu inuit 24-t apersuinermi immersugassamik akissuteqarsimasut aqutigalugit takunnissinnaalerpugut. Akissutit assigiinngiaartorujussuit takusinnaavarput, pingaartumik kajumissutsimik sulisuunermi kajumissutsimut uuttuutaasut assigiinngitsorujussuunerannik oqariartuuteqartut. Kalaallit Nunaanni suut pissutigalugit kajumissutsimik sulerusuttoqartarnersoq pillugu taamaalilluni paasinninnerullutalu ilisimasaqarnerulerpugut. Ilaannut nammineq inuttut pissutaasunut tunngassuteqarpoq allanullu inuiaqatigiinnut tunniussaqaarnissamut tunngassuteqarluni. Akissutigineqartut aqutigalugit kajumissutsimik suliaqartut eqqarsaataasa suunerannik ataasiakkaallu pingaartitaasa suunerannik siammasissorujussuarmik ilisimasaqalerpugut.

Annertussuseq aallaavigalugu misissuineq una aqutigalugu paasinninnitsigut ilisimalikkavut taakku atorlugit kajumissutsimik suliaqarneq soqutiginarnerulersissavarput.